

書名 西湖遊覽志二十四卷 嘉靖二十六年序刊萬曆十二年序江陰范鳴謙修本  
撰者 明 田汝成 撰  
卷 卷二十  
內容分類 史·地理·名勝·浙江  
索書號 倉石20405  
編號 2037500

# 卷二十

彩色首頁1

[東洋文化研究所漢籍目錄 編號: 2037500](#)

[東洋文化研究所漢籍目錄所藏漢籍善本文影像資料庫 索書號: 倉石20405](#)

[漢籍善本文影像資料庫文本 西湖遊覽志二十四卷 嘉靖二十六年序刊萬曆十二年序江](#)

[陰范鳴謙修本](#)

[版權所有: 東京大學 東洋文化研究所](#)

[使用上的注意事項](#)

## 西湖遊覽志第一卷

### 西湖總叙

錢唐田 汝成 輯撰

西湖故明聖湖也周繞三十里三面環山谿谷縷注  
下生淵泉百道瀦而為湖漢時金牛見湖中人言明  
聖遂稱明聖湖以其介于錢唐也又稱錢唐湖  
以輪委于下湖也又稱上湖以其負郭而西也故  
稱西湖諸山之脉皆宗天目天目西去府治  
十里高三千九百丈周廣五百五十里蜿蜒  
深拔峭舒岡布麓若翔若舞萃于錢唐而嶺

西湖遊覽志第二十卷

錢唐田汝成輯撰

北山分脉城內勝蹟

城闈

武林門錢塘門

武林門宋名餘杭門俗稱北關門入門而南有虎  
林山土阜陂陀高可三丈廣不滿百步宋楊至  
質記云耆舊言錢氏有國時此山復在郭外叢  
薄蒙密異虎出焉故名虎林吳音承訛轉虎爲  
武耳葉紹翁四朝聞見錄乃謂虎林卽靈隱山

因避唐諱改爲武林元非有兩山一爲虎林一爲武林也樓攻媿爲太乙宮道士賦詩云武林山出武林水靈隱後山毋廼是此山亦復用此名細考其來真有以從來有龍必有珠此雖培塿千山餘蓋疑此山爲靈隱之餘脉是又指二山同爲武林矣淳祐志斷之以爲漢志明載武林山爲武林水所出決非城內之山自漢已名武林亦非避唐諱而爲武蓋此坡爲城中勝地或者自寓武林之名于此耳門東有水門出大河西河清河之水達于運河又東宋有天宗水

### 門小北門今塞

錢塘門宋時所築按錢塘記云防海大塘在縣南一里郡議曹華信議立此塘以防海水始開時募有能致一斛土者與錢一千來者雲集因不復取皆棄去而塘成故改名錢塘張君房云杭州武林山在錢唐縣西南靈隱寺在其上寺東有水曰龍源橫過寺前卽龍溪也冷泉亭在其上西有水曰錢源過橫坑橋入錢湖錢湖一名金牛湖一名明聖湖湖有金牛遇聖明卽見萬松嶺下西城第一門曰錢湖門次北第三門曰

湧金門卽金牛出見之所也第四門曰錢塘門  
舊縣解在焉蓋自前古居人築塘以備錢湖之  
水故曰錢唐據此則錢唐之名一起於江一起  
於湖二說兩義按史記秦始皇過丹陽至錢唐  
則秦時已有之非始于華信明矣自漢已來江  
潮爲患築塘捍之今云築塘以備錢湖之小事  
無稽證攷之釋文云唐途也錢古錢姓豈秦漢  
間有姓錢者居江干或築塘以捍海遂以起名  
如富陽孫洲之類是也至于錢塘門名第因錢  
唐舊縣治近此門因得名耳非取義于錢湖也

衢巷河橋

入武林門折而東過中正橋又南至觀橋其街之東  
爲廣豐廣積二倉橋街仁和倉街普寧坊西爲同德  
坊興賢坊報恩坊

中正橋俗稱斜橋自此而南至正陽門爲宋時御  
街長一萬三千五百尺舊鋪石板衢從三萬五  
千三百有奇咸淳七年安撫潛說友易其闕壞  
者凡二萬幅然後經涂九軌砥平矢直至元時  
兩岨民居稍稍侵切然綽楔無敢跨街建者  
皇明正德已前猶然至嘉靖元年御史何鉞始

西河志卷之五  
爲鄉貢士建坊于吳山坊北自是題名楔綽並  
肩而立矣然杭城多火自綽楔誇街而火益熾  
以木則易於燎延以石則人憚崩摧莫敢向適  
撲救古人旌別宅里之義恐不如是

並寧坊俗稱清遠橋巷其東宋有仁和縣丞廳又  
東有太社太稷壇紹興十二年築以春秋二仲  
臘前一日祭其禮視皇祇之制壇之北有靈池  
雖旱不竭稍北有天宗鹽庫酒庫市舶務過天  
水院橋有六部架閣淳祐倉草料場○天宗庫  
貯鹽酒以待宗人之頒給者○六部架閣以貯

六部圖籍案牘者蓋漢掌故之遺也紹興三年  
建○淳祐倉淳祐九年京尹趙與憲建以儲米  
之糶于帥司者○草料場受畿內所輸稻麥苜  
以給騏驥院良馬院與三衙諸府之馬

同德坊俗稱燈心巷其西爲祥符橋桐樹園新莊  
橋橋左右宋有貢院別試所大理寺仁和縣仁  
和學豐儲倉軍器所東太乙宮萬壽觀元真觀  
晨華館千佛閣安福寺並廢○桐樹園 國初  
有鐵作局○貢院宋時三州治貢院在錢唐門  
外王家橋以試本州之士漕司貢院在北關門

外以待兩浙寓士及有官人宗女夫等禮部貢院在新莊橋東以待進士紹興十年始定取士之法三年一舉必有手札付考官敦求賢之意自淳熙二年帝作聞喜燕詩賜進士詹駉等遂爲令典踵行並刻石院中○別試所以待貢士之避親嫌者其後申監漕選者亦試于此○大理寺舊在錢唐門內紹興二十年以其密邇景靈宮號控鞭撻之聲非所以妥神也乃徙於此寺前有清明池○仁和縣吳越時分自錢塘置錢江縣在梅家橋西宋初改仁和紹興三年徙

建於此高宗初入杭州問縣名仁和喜曰此京師門名也蓋太祖次陳橋驛從仁和門入以爲吉兆故駐蹕之意始定矣○仁和學在縣治之東有文行忠信四齋○豐儲倉景定初賈似道行公田法以此收其租入○軍器所以造御前器械紹興初以內侍提點後改隸工部○東太乙宮紹興間建以祀五福太乙之神兩廡繪三皇五帝日月星辰嶽瀆九宮貴神每歲四立日祀之四孟車駕亦幸焉虎林山在其後圃○萬壽觀紹興間建以大霄殿奉昊天寶慶殿奉聖

祖長生殿奉長生帝後殿奉太祖以下諸帝西側純福殿奉元命四孟朝獻畢車駕詣宮行香景定間建晨華館于千佛閣之東命羽流王之觀東有回龍橋○元真觀唐中宗景龍二年建遂名景龍後唐改中興觀錢武肅王病目禱而愈改爲錢明宮宋雍熙二年改元真觀大中祥符間改天慶觀天禧間王欽若請移天慶于真聖觀復名元真○千佛閣安福寺今廢爲同仁祠

興賢坊以元時貢院得名

報恩坊俗稱觀巷有報恩光孝觀舊名開元宮清泰四年錢王建宋景德四年改景德觀崇寧三年改崇寧萬壽觀賜田千畝政和三年建徽宗本命殿紹興七年改報恩廣孝院尋改光孝以崇奉香火其西宋有惠民西局御厨小營宋之惠民局有五皆貯藥以待病者

觀橋吳越王建題其梁曰吳越王寶正六年辛卯四月八日因建錢明觀造此石橋吳越國王記觀橋之水自東而西過青蓮橋祥符橋折而北合清湖之水

自觀橋而南至衆安橋其街之東爲懷遠坊安國坊  
延定坊西爲保和坊純禮坊澄清坊

懷遠坊俗稱軍頭司巷宋時有軍頭司在焉

安國坊與保和坊對俗稱北橋巷宋有文思院吉  
祥寺並廢○文思院掌金銀犀玉工巧之制綵  
繪裝鈿之飾輿輦法物尺寸之度規鈇鎔鑄鏤  
織之法內外所領凡三千餘作○吉祥寺宋乾  
德三年睦州刺史薛溫捨宅爲寺治平二年改  
廣福南渡初割其兩傍地爲文思院軍頭司而  
寺額改吉祥今爲民居蔡端明吉祥寺賞牡丹

對月詩花未全開月未圓看花對月思依然明  
知花月無情物若使多情更可憐蘇子瞻簪牡丹  
詩人老簪花不自羞花應懶上老人頭醉歸  
扶路人爭笑十里珠簾半上鉤又花將落而陳  
述古期不至詩今歲東風巧剪裁含情只待使  
君來對花無語花應恨直恐明年便不開述古  
期明日至因用前韻詩儂衣不用剪刀裁國色  
初酣卯酉來太守問花花有語爲君零落爲君  
開又惜花詩吉祥寺中錦千堆前年賞花真盛  
哉道人勸我清明來腰鼓百面如春雷打徹涼



西海志卷三十一  
州花自開沙河塘上插花回醉倒不覺吳兒哈  
豈知如今雙鬢摧城西古寺沒蒿萊有僧閉門  
手自栽千枝萬葉爭巧裁就中一叢何所似瑪  
瑙盤盛金縷盃而我食菜方清齋對花不飲花  
應猜夜來雨雹如李梅紅殘綠暗吁可哀跋云  
錢唐吉祥寺花爲第一壬子清明賞會最盛金  
盤綵籃以獻坐者五十三人夜歸沙河塘上觀  
者如山爾後無復繼也今年諸家園圃花亦極  
盛而龍興僧房一叢亦奇但衰病牢落無以發  
與耳昨日雨雹如此花之存者有幾可惜也又

冬至遊吉祥寺詩井底微陽迥未回蕭蕭寒雨  
濕枯荻何人更似蘇夫子不是花時肯獨來後  
十日復至詩東君意淺看寒梅千朵深紅未暇  
栽安得道人殷七七不論時節遣花開明年冬  
十月寺中牡丹開數朶述古作詩子瞻和云一  
朶妖紅翠欲流春光回照雪霜羞化工只欲呈  
新巧不放閒花得少休又云當時只道鶴林僊  
解遣秋花發杜鵑誰信詩能回造化直教霜枿  
放春妍

延定坊舊名清寧坊其東爲度生橋俗稱鵝鴨橋

西滄志卷二  
橋畔宋有春風樓謂之北酒庫

保和坊俗稱磚街巷

純禮坊與延定坊對名後洋街俗稱竹竿巷

澄清坊在衆安橋北塊沿河者

自純禮坊而西其街之南爲井字樓北爲孩兒巷燈籠巷新營街

井字樓宋酒樓也疊構如井故名其西有白澤廟新營街之西元有江淮財賦總管府丞相伯顏祠府地廢爲民居祠地爲按察司馬廐矣

自澄清坊而西轉入興慶坊爲潘閔巷紀家橋

興慶坊舊名前洋街與結縛橋對

潘閔巷宋初處士潘閔所居也閔字道遥錢唐人

有詩名語見才情雅致志中巷內有三官宅

紀家橋在按察司右元時改乘驄橋北察院在焉

今之嘉湖道卽其址也其西爲西湖書院 國

初改仁和學天順間學徙而其地併北察院皆

爲按察分司及囚舍矣○紀家橋之南爲德化

坊舊稱木子巷有明慶寺千頃廣化院並廢○

明慶寺唐大中二年建有法喜堂明碧軒南宋

駐輦遂勅比東京相國寺祈禱雨暘建散聖節

咸在焉嘉熙四年七月理宗幸寺祈雨回鑾撤  
蓋甘雨隨注平章喬行簡上詩稱賀上遂書明  
慶二字以旌之淳祐六年建法堂上復題爲南  
山道場嘉泰三年建御書閣題曰宸奎萬壽之  
閣有蘇子瞻書觀音經碑○王介甫法喜堂詩  
浮屠之法與世殊洗滌萬事求空虛寸心以此  
不掛物一堂收身自有餘堂陰置石雙巒岬石  
根立竹青扶踈一來已覺心膽豁况迺宴坐窮  
朝脯初憶幼時勇自許壯大看俗尤崎嶇豐車  
肥馬載豪傑少得志願多憂虞始知進退各一


理造次未可分賢愚會將築室返耕釣相與此  
處吟江湖又明碧軒詩明碧軒南竹數叢別來  
江介幾秋風道人無復人間世嗟我今爲白髮  
翁趙忠簡公明慶僧房夜坐詩月明牕竹冷橫  
斜坐看風燈落燼花老眼病餘嫌細字枯腸寒  
甚怯清茶囊空豈是久爲客夢短其能飛到家  
但有流年侵髮髮蕭蕭蓬葆颯霜華○千頃廣  
化院開平元年吳越王建南渡後爲臨安府祝  
聖道場僧了性善學草書趙閱道題其堂曰  
垂慈以著醫績蘇子瞻作草書歌以贈之歌云

物生有象乃有滋夢幻無根成斯須方其夢時  
了非無泡影一失俯仰殊清露未晞雪已驅此  
滅滅盡乃真吾云如死灰實不枯逢場作戲三  
昧俱化身爲醫忘其軀草書雖學聊自娛落筆  
已喚周越奴蒼鼠奮鬚飲松腴剡藤王版開雪  
膚游龍天飛萬人呼莫作羞澁羊氏姝

自按察司而南至安福橋折而東至八字橋河南爲  
通寶坊河北爲豐財坊

豐財坊宋有左藏庫先是韓蘄王有賜第二在新  
莊橋者獻于朝爲景靈宮在八字橋者獻以爲

左藏庫庫有東西受財賦之入以待邦國之  
費東則幣帛絕袖之屬西則金銀線券絲纈之  
屬統于太府寺宋時經費多糜于贍兵西蜀湖  
廣江淮之賦類歸四總領所以餉諸屯唯閩浙  
所輸歸于左藏而大軍取十之七官禁百司之  
祿裁三之值有浩費則天子出中帑封樁以補  
所闕 國初以其地賜蔡指揮今半爲官署民  
居矣又西爲楊駙馬府卽端孝公主第也駙馬  
名鎮方建第時命巨璫董宋臣領之大拓四旁  
其最逼近者爲太學生方大猷之居璫意其必



雄據未易與語一日具禮往訪之方延入坐璫  
未敢有請方遽云內轄相訪得非以小屋奉上  
旨乎璫愕未及對方徐曰內轄以某太學生將  
梗化耶便當首獻卽案書契與之璫以契奏理  
宗大喜數倍酬之方表謝曰普天之下莫非王  
土一毫以上悉出君恩蓋上用毛詩下用蘇子  
表語也理宗又奇之自此擢第登朝旋躋膺仕  
矣今其地半爲按察分司

入錢唐門而東折而南爲白龜池鑷子井黑亭子

白龜池在城下裴廣四畝許池底通西湖李鄴侯

所鑿其水自來不堪汲飲元仇仁近嘗卜居池

上作詩云一琴一鶴小生涯陋巷深居幾歲華

爲愛西湖來卜隱却憐東野又移家荒城雨滑

難騎馬小市天明已賣花阿母抱孫閒指點疎

林盡處是棲霞池傍宋有都作院

鑷子井在上方寺南水口在湧金門外

黑亭子舊有水溝透城通柳洲寺


門內舊有景靈宮錢唐縣錢唐學上方寺並廢○

景靈宮本宋韓蘄王世忠宅也紹興十三年建

以奉祖宗衣冠之游蓋漢原廟之遺也宋制太

廟以奉神主一歲五饗朔祭而月薦五饗宗室諸王攝事朔祭月薦則太常寺卿代之景靈宮以奉塑像歲四孟天子躬祭次日繹祭則后妃六宮從往帝后忌辰則宰相率百官行香道士作法事天章諸閣以奉繪像時節朔望帝后生辰皆徧薦之內臣攝事欽先孝思兩殿亦以奉小像上日焚香太廟之祭以俎豆景靈宮以牙盤天章諸閣以常饌用家人禮云宮內有崇禋館命羽流主之蟠樞亭流盃堂四并堂橘園桂園景靈池以湖水灌之水口在昭慶山門左○

錢唐縣紹興初詔以錢唐仁和比開封祥符縣選才授任謂之赤縣仁和迺錢唐所分于錢唐尤重縣前有字民坊淳熙初徙紀家橋



大重續前古字月夜手錄卷之二

巽才外卦體之赤繩一呼喚澹書而分于澹書  
澹書緝錄與此篇以澹書二味也開桂新書

明倫彙編  
家範典  
卷之六